

այնտեղ, գերեզմանում, ես էլ երկնքում կը լսեմ ջո խօսքերը եւ կ'օրհնեմ քեզ»:

Արովեան հաւատարիմ է մնում ինքն իրեն եւ իր խօսքին: «Նա երբեք մտքից չէ հանում եւ այս յորդորները: Ձեռք է բերում գերմանական կրթութիւնն ա՛յնպէս, ինչպէս հագիւ թէ մի ուրիշ ասիացի մարդ: Դրա հետ մէկտեղ՝ նա հաւատարիմ է մնում եւ իր հաւատին, իր եկեղեցուն» (I. 213-214):

Այս խօսքերը լիովին համապատասխանում են իրականութեան: Ծանօթ է նաեւ, թէ Դորպատից վերադարձած Արովեանը ի՛նչ ընդունելութիւն է գտնում էջմիածնում:

Արովեանի բնաւորութեան, նրա նկարագրի մասին հետեւեալ տողերն ենք գտնում Հաքստաուզէնի մօտ.—

«Արովեանը այն ազնիւ, ճշմարիտ եւ մըտացի բնութիւններից էր, որպիսիք մեզ շատ հազուադէ՛պ անգամ պատահում են կեանքի մէջ: Նա վառ հայրենասէր էր, սիրում էր իր հայրենիքը» (I. 180):

Մի ուրիշ տեղ (I. 305) Հաքստաուզէն Արովեանին անուանում է «խոշոր տաղանդ»:

Եւրոպացի ճամբորդը կարողացել էր թափանցել Արովեանի հոգու խորքը, հասկանալ նրա էութիւնը: Արովեան գործով էլ ցոյց էր տուել, որ արժանի է նման գնահատականի:

Թէ Արովեան որպիսի թանկագին ծառայութիւններ է մատուցել իրեն՝ Հաֆստաուզէնին, վկայում է վերջինս ինքը իր աշխատութեան մէջ, բազմաթիւ անգամներ: Այդ վկայութիւնները ամփոփում են նրա հետեւեալ խօսքի մէջ.

«Յետագայ հատուածների (այսինքն՝ Հայաստանի եւ հայ ժողովրդի մասին առաջ բերած տեղեկութեանց) մեծազոյն մասը ես պարտական եմ նրան, Արովեանին, ապա նաեւ՝ իմ սեփական դիտողութիւններին, որոնք նմանապէս մէկ մասով նրանից են ստացել իրենց մղումը» (I. 180):

Մի երկու մանրամասներ եւս:

Մի երեկոյ (25 օգոստոս 1843), երբ Հաքստաուզէն Արովեանի հետ միասին այցելում են Երեւանի բարձրադիր եկեղեցին ու նրա մօտի վանքը, այդ տեղից էլ դիտում դէպի Արարատ քաղաքը «սքանչելի տեսարանը»

երկու բարեկամները մինչեւ երեկոյ իրար հետ են լինում, խօսակցութեան բռնուած:

«Այդ ու յաջորդ օրերին ես ձեռք բերի, առում է գերման ուղեւորը, ահագին թուով նօթեր՝ հայ ժողովուրդի կենցաղավարութեան, նրա բարքերի ու սովորութեանց, առանձնաշատկութիւնների եւ ձգտումների մասին: Այդ ձեւով ես կարողացայ ստանալ մի պարզ հայկացք այդ ժողովուրդի ներքին կեանքի մասին — այնպէս ու ա՛յն չափով, որ կարծես թէ ես ամիսներով ապրած լինէի նրա մէջ... Որովհետեւ Արովեան նկատեց շուտով, որ ես առհասարակ ժողովուրդների կեանքը սիրով եմ ուսումնասիրում, ուստի հաղորդեց ինձ անկեղծութեամբ ամէ՛ն ինչ, այո՛, մինչեւ անգամ ինքը սկսեց հրաւիրել իմ ուշադրութիւնը շատ բաների վրայ: Եւ որովհետեւ նա չորս տարի շարունակ գերմանացիների մէջ էր ապրել Դորպատում, ու պա՛րզ էին նրա համար այդ երկու ժողովուրդների կեանքում եղած նման եւ տարբեր գծերը, ուստի բաւական էր մի հարց, բաւական էր իմ կողմից մի մղում, որ նրա մէջ ծագէին ինձ հաղորդելիք զանազան մտքեր ու յիշողութիւններ» (I. 179-180):

Արովեանի «Պատանեկան յիշողութիւններին» մասին, որոնցից այնչա՛փ առատօրէն օգտուել է Հաքստաուզէն, (տես՝ I. 194, 203 եւ այլն), եւ որոնց մասին մի քանի անգամ խօսք է անում նա, հետեւեալ մանրամասնութիւնն է տալիս (I. 191, ծանօթութիւն).—

«Արովեանը Դորպատում եղած միջոցին մի տետրի մէջ գրի էր առել, իր պատանեկան յիշողութիւնները, որոնք հայ ժողովրդի կեանքի մասին բազմաթիւ հետաքրքրական գծեր էին պարունակում: Արովեան ինձ նուիրեց այդ տետրը՝ օգտուելու համար նրանից»:

Ահա այդ տետրից է, որ Հաքստաուզէն բառացիօրէն, (I. 191 եւ այլն) կամ բովանդակութիւնը միայն տալով, առաջ է բերում բազմաթիւ հատուածներ ու զանազան կտորներ հայ ժողովրդական բանասիրութիւնից ու սովորոյթներից: Դրա համար է, որ Հայաստանի եւ հայ ժողովրդի մասին Հաքստաուզէնի գրքի մէջ առաջ բերուած հատուածների հեղինակ համարել կարող ենք, ամենայն իրաւունքով, որչափ գերման ականաւոր ճամ-